

Nalinginnaasumik nassuiaatit

Inatsisartut sulinermit tapiissutunik qinnuteqarnissamut tunniussinissamullu aalajangersakkap maanna atuuttup ukiumut siulianut naatsorsuutunik kukkuniarsiukkanik, tapiissutunik qinnuteqaateqarnermut peqatigitillugu, nassiussinissamik piunasaqaatitaqarnera naleqquttuunngitsooq paasinarsisimavoq.

Tapiissutunik pissarsisinnaatitaasut ukiumut siulianut naatsorsuutunik kukkuniarsiukkanik janua-imili nassiussereersinnaanerit piviusumik isigalugu periarfissaqanngilaq.

Naleqquttuunngitsup tamatuma siunnersuutikkut matumuuna piviusunngortinneqarsinnaasumik aaqqiivigineqarsinnaanera anguniarneqarsimavoq, partiimummi, katusseqatigiinnut attaviitsumulluunniit tunniunneqarsinnaasut tapiissutit marlunnet avillugit tunniunneqartarmata. Tapiissuteqarfigineqarnissamik qinnuteqaammik, tapiissutit qinnuteqaatigineqartut atorneqarnissaannut aammalu ukiup siuliani tapiissutit atorneqarsimanerannut uppersaammik ilaqartinneqartumik, Siulittaasoqarfiup suliarinninnera tunngavigalugu tapiissutit affaat siulliit tunniunneqassapput. Naatsorsuutit kukkuniarsiukkat Inatsisartut Siulittaasoqarfiannut nassiunneqarpata tapiissutit avinnerisa arlaat tunniunneqassapput.

Aalajangersakkanut ataasiakkaanut nassuiaatit

§ 1, nr. 1-imut

Inatsisartut inatsisaanni §§-ni 2-4 maleruagassat malillugit Inatsisartuni sulinermit partiit, katusseqatigiit attaviitsullu tapiissutunik pisinnaatitaasut Inatsisartut Siulittaasoqarfiannut qinnuteqaateqarnermikkut, tapiissutisinissamut piunasaqaatit eqquutsinneqarneri Siulittaasoqarfimmit aalajangerneqareerpat, tapiissutit affaannik tunneqarsinnaapput. Tapiissutit ukiup siuliani tiguneqarsimasinnaasut naalakkersuinnikkut sulinermit atorneqarsimanerannik tamatumalu ingerlateqqinneqalersaanneranik Siulittaasoqarfimmut uppersaammik qinnuteqaat ilaqartinneqassaaq. Ukiumut siulianut naatsorsuutit kukkuniarsiukkat tapiissutunik pissarsisumit Inatsisartut Siulittaasoqarfiannut nassiunneqarpata tapiissutit affaat sinneruttut aatsaat tunniunneqassapput. Naatsorsuutit kingusinnerpaamik ulloq 30. juni nassiunneqassapput.

§ 2-mut

Allannguutit atuutilissapput ulloq 31. december 2003-mi.